



**D**Romgethes ob eximiam probitatem & in rebus agendis dexteritatem post Sitalchum rex Gothorum creatus est, eo tempore quo Lysimachus fortissimus princeps proximos Scythiæ populos regendos suscepisset, qui prius ferum leonem deuicerat. Is Alexandri præcepti immemor, qui Gothos uitandos cēsuit, eos bello lacessere ausus fuit. Itaq; Dromgethes magno animo ei obuiā progressus, in aperto loco eum fortiter excepit. Ibi commisso prælio uictoria apud Gothos fuit, atque Lysimachus uiuus in eorum potestati uenit. Cum aut Dromgethes Lysimachi eruditionem et fortitudinem cognouisset, ipsum hospitaliter donatum & amicitia sibi deuinctum amissæ libertati restituit. Sunt quidā qui hunc Dromgethem Thraciæ regem constituerunt: uerū Iordanes & Strabo eum Getarum regem fecerunt. Ioan. Mag. lib. 3. cap. 14. Hist. Goth.